

KATTIN BERGARA IPAR EUSKAL HERRIKO KORRIKAKO ARDURADUNA

«Helduen euskalduntzeak, inoiz baino gehiago, indarra behar du»

Hartzea Lopez Arana | BAIONA

Baionan ere prentsaurrekoa eskaini zuen atzo AEK-k, 13. Korrika aurkezteko. Maulen abiatuko da apirilaren 4an, eta 24 orduz eskuz esku pasako da lekukoa Ipar Euskal Herrian zehar, Hendaian biharamunean ateratzeko. Kattin Bergara Korrikako arduradunak lasterketa honen kari euskararen alde AEK-k egindako lana aipatzen digu.

■ Datorren Korrikak zer mezu plazaratu nahi du?

Ohituraz bezala festa giroan eginen da, eta dudarik gabe, eite ludikoa dauka Korrikak. Baina gertakari garrantzitsu honen bidez, aldarrikapen batzuk herri eta hiri guzietara hedatu behar ditugu, euskararen egoera ez delako tamalez os-

patzekoa. Lurralde osoan, euskarak ofizialtasuna behar du, ez bakarrik Ipar Euskal Herrian. Aski da Nafarroan euskarak jasaten duen egoera ikustea, atzerapauso nabarmenak gertatzen ari dira bertan martxan ezarri den hizkuntz politikaren ondorioz.

■ Iaz Hitzarmen Bereziak ezagutza maila bat eman zion AEKri. Zer aldatu da geroztik?

Hogei urte baino gehiago darmatza AEKk Ipar Euskal Herrian helduei euskara irakasten eta hizkuntzaren normalizazioa galdetzen. Euskaltzaleen eta boluntarioen lanak atxiki du zutik egitura. Hitzarmen Bereziarekin iaz izandako kontratuarekin, AEKk ezagupen ofizial minimoa eskuratu zuen. Konkretuki, alor batzuetan

gauzatu da hitzarmen hau. Adibidez, lehen urratsa hasten duten ikasleei lehen 90 orduak urrik ematen zaizkie. Gorakada sentitu da inskripzioetan, ate berri bat ireki dela ziur da. Baina funtsezko arazoa beti dago zintzilik: euskarak bizi publikoan bigarren mailako estatusa duen bitartean, ikasle batzuek ez dute hizkuntzaren behar praktikoa sumatuko.

■ Hizkuntzaren transmisioak ere behera egin du Ipar Euskal Herrian.

Gero eta guraso gehiagok haurrak ikastoletara edo eskola elebidunetara eramaten dituzte, baina belaunaldien arteko transmisioa hautsi egin da, eta helduen euskaratzeak inoiz baino gehiago indarra behar du hizkuntza berreskuratzeko.

■ Zenbat ikasle duzue?

NORMALIZAZIOA

«Ez Dok Amairu kolektiboak egin zuen lanaren ildotik segitu nahi dugu»

Gaur egun 1.100 dira AEKn ikasten dutenak, eta 20 bat gau eskola daude Ipar Euskal Herrian zehar. Ikasle gehien lehen motibazioa eskual-

dean integratzea da, horretarako lekuko hizkuntza ikasiz. AEKrekin eta Korrika bezalako ekimenekin euskal guneak zabaltzea dugu xedetzat, hizkuntza baten ikasteko 900 ordu kurtso inguru direlako beharrezkoak, eta ikasleen motibazioa pizturik atxikitzea ezinbestekoa da.

■ Korrikako parte-hartzaileak emendatu dira?

Adin eta sektore guzietako jendea biltzen da, edozein toki eta ordutan lekukoa hartzeko prest. Pozgarria da guretzat, gure lana balorizatzen duelako. Orain, Ez Dok Amairu kolektiboak egin zuen bezala, kulturari eta euskarari indar berria eman behar diogu, guzietatik batera.

■ Batera plataformaren deiarekin bat egin duzue.

Dauden lau eskakizunen artean, bat betidanik galdetzen dugu, eta euskalgintzako eragileak izanik, aktiboki parte hartuko dugu otsailaren leheneko manifestazioan.

(Aurreko orrialdetik dator)

dei egiten dizuegu Korrikan parte har dezazuen», esan zuen.

Era berean, Korrika euskararen alde Euskal Herri osoan egiten den ekimen bakarra dela azpimarratu zuen Agirregomezkortak, eta Korrika beraren xedeak ere zehaztu zituen: «Euskararen aldeko kontzientzia suspertzea eta gau eskola zein euskaltegien eguneroko lana indartzeko dirua biltzea du helburu». Baina lan hori egin ahal izateko, dirua edukitzea ezinbestekoa dela nabarmendu zuen Nazio Batzordeko kideak, eta horregatik behar zuela euskarak Korrika inoiz baino gehiago argitu. «Euskarak ere Korrika behar du. AEK-k herria behar du, eta hori islatzeko modu onena Korrika da», agertu zuen.

Herritarren partehartzearen garrantzia

Korrika 13an herritarren partehartzea hain garrantzitsutzat jo du AEK-k, ekimenaren irudia ere horretan oinarritu duela. Izan ere, tximeleta bat da aurtengo lasterketaren logotipoa. Brouardek azpimarratu zuenez, beren-beregi aukeratu zuten irudi hori, eta Tximeleta Efektuaren teoria fisikoa ekarri zuen gogora: «Teoria horren arabera, tximeleta batek Txinan egin dezakeen hegalkadak eragina izan dezake munduko edozein ekaitzetan. Guk ere gauza bera erakutsi gura dugu honekin, edozein herritarrek euskararen alde egindako lanak etorkizunearan eragin handia izan dezaakeela».



EGUNKARIA

Ez Dok Amairu kultur taldeko kideak. Besteak beste, Benito Lertxundi, Lourdes Iriondo, Jexux Artze, Mikel Laboa eta Xabier Lete ageri dira.

A.I. | BILBO

Euskararen aldeko borrokan jarrera baikorra izan behar dela eta Euskal Herriko gizartearen eta euskararen beste berpizkunde bat aurki izango dela zabaldu gura du Korrika 13k Euskal Herriko herrietan eta auzoetan. Hori aitzakia moduan hartuta, 60ko hamarkadaren amaieran eta 70eko hasieran euskal kulturaren berpizkundea ekarri zuten guztiak omenduko ditu aurten Korrikak.

Era berean, mugimendu horren ikur nagusi izan zen Ez dok Amairu taldeak bere sasoian zabaldu zuen mezua

Euskal kulturaren berpizkundea, eredu

OMENDUAK. 60ko hamarkadaren hasieran eta 70eko amaieran euskal kultura berri zuen mugimendua gogoratuko du Korrika 13k

ere bere egin du Korrika 13k. Jorge Oteizak ipini zion taldeari izen hori, Resurreccion Maria Azkuek jasotako Bizkaiko ipuin bat oinarri gisa hartuta, Hamahiru zenbakia- ren malefiziorik ez dagoela adierazi gura izan zuen Oteizak, eta etorkizunari itxaropenez begiratu behar zitzaioela.

«Oso egoera zailean, eta diktadurapean euskal kantagintzari eta euskal kulturari oro har berebiziko bultzada ematea lortu zuten moduan, geuk ere, eraso, zatiketa juridiko eta neurri murriztaile guztien gainetik, aurrera egiteko moduan gaude lanari ilusioz ekiten badiogu», azaldu zuen

Korrika 13ko arduradun Edurne Brouardek.

Omenaldi ekitaldia otsailaren 16an izango da

Korrika 13ko omenduen lana eta ekarpena gogora ekartzeko, hainbat ekitaldi antolatuko ditu AEK-k. Besteak beste, datorren otsailaren 16an saio berezia izango da Donostiako Kursaallean. «Ezin dugu gauza handirik aurreratu. Ikusentzuneke ikuskizuna izango da, eta bertan, mugimendu kultural horretako hainbat kide izango dira», azaldu zuen Brouardek. Horrez gain, omenduei begira antolatutako beste ekitaldi batzuk izango direla gaineratu zuen.